

Nda Bouxcuengh

壮族背带

□ Dahdingz cingjleix fanhoiz



▲ Mbangj gijsiug gijdoz gwnz nda Bouxcuengh Lozvez.

◀ Nda Bouxcuengh gyaeundei.



▲ “Va” gwnz nda, “hai” ndaej lwenqda.

Daj ciuhgeq daeuj, youq dieg Bouxcuengh cujyau baengh dajndaem gvaq ndwenngoenz haenx, vanzging ganhoj, hawj haujlai daxmeh youq seiz roengz reih guhhong roxnaeuz benz bya gvaq ndoi bae caencik caeuj ganj haw, aeu yungh nda daeuj aemqdaewz lwnyez.

Gaengawq seiz aeuyungh, nda baen guh gij ngoenznaengz yungh caeuj gij ngoenzciet yungh song cungj, gij nda youq ranz yungh roxnaeuz bae haw yungh sawcengh saek mbaeu, mbouj miz va roxnaeuz va noix, dingzlai cungj dwg yungh gij baengz dingj ndaej saeg daeuj guh, hoeng gij ngoenzciet yungh haenx, couh daegbied gyaepgouz gyaqciq.

Aenvih nda miz hamzeiq daegbied, gij goengrengz mehmbwk yungh daeuj guh nda haenx ceiq lai. Caemh aen minzcuz, gij ceng'ca mbanj caeuj mbanj engq daejyienh youq dinfwngz caeuj yienghva diuznda. Diuz nda iqetet ndeu, danh gij dinfwngz dajsiug couh miz geijcib cungj. Gij yienghva gwnz nda, aenvih miz gij goengnaengz dingjlauh cihaw daejyienh gij vwnzva vunzlai, gyoengq mehmbwk minzcuz mbouj doxdoengz, dieg mbouj doxdoengz, nga mbouj doxdoengz haenx aeu gij geiqndaej lizsij caeuj gij fouzhauh duzdwngz minzcuz yungzhaeuj ndawde bae.

“Aen nda ndeu goek gyaeraez”, youq mwh diuz mingh'iq ndeu hainduj daiqndang doekseng, couh gaengq bienqbaenz gij naek ceiq van daxmeh rapdawz lo, hoeng diuznda, cawqdingh bienqbaenz dieg yietnaiq lwnyez buetcoh ciuhvunz vuen-yungz. Siengj ndaej ok, lwnyez cwxcaih youzlangh youq ndaw simgyaez majhung youq mwh dauqngex seiz lwnyez bonjfaenh, wnggai gamjsouh ndaej daengz cungj rengz cingzngex vunz ndaw ranz gwnz seiqgyaiq ceiq mbouj miz seisim

caemhcaiq ceiq hungmbwk neix.

Gij nda conzduj, itbuen baenzranz gaxgonq youz lwgsau gag guh roxnaeuz baenzranz le youz beixnuengx ranzdaiq (yahdaiq, nax-bawx) soengqhawj. Mbangj dieg daengz seizneix vanzlij miz gij fungsug seiz senglwg rim ndwen yahdaiq soengq nda, seiz yahdaiq soengq nda itbuen gapbaenz bang vunz ndeu, ciengzmienh lumj seiz baenzranz nei angqyangz. Ngoenz cingj laeuj lij anbaiz eu fwen dem, ndawde miz eu 《Fwen Nda》, daihgaiq neiyungz dwg cuknyienh gvanbaz nienzoiq gyaranz vuenyungz habhoz, cuknyienh lwglan ndangcangq bingzan, lij miz couhdwg eu gij nda siuqva guh ndaej gyaqciq, yungh neix gangjok gyo'mbaiq.

Aenvih gij fungsug minzcuz soengq nda, vunzlai gig maij cimyawj diuznda, ndigah vunz ranzdaiq youq mwh guh nda siuqva gig gyaepgouz gyaqciq, cawzbae yahdaiq daj goek daengz byai guh, lij iucingj cangh-dajsiug, canghraedceij daengj doenghboux dinfwngz ak neix daeuj doxcaez bang dem, muzdiz couhdwg aeu guh ok gij nda siuqva gig ndaej vunzlai haenx haenx. Hix cingq dwg

diuzvih yienghneix, gij dinfwngz fwngzguh diuznda ndaej riuzcienz roengzdaewj gyaenan.

Nda youq ndaw gyaranz miz gij gvanhnen lwglan daih cieq daih lienzdaemh roengzbae rag laeg goek maenh haenx, ciengzseiz dwg daeggo yungh liux hawj daegnuengx, daeg-nuengx yungh liux hawj dahnuengx, itcig yungh daengz vaih yungh mbouj ndaej bae, lij suj youq ndaw loengx sij mbouj ndaej vut. Linghvaih, ciug gij fungsug mbangj dieg, diuznda yungh gvaq haenx aeu laeglemx daiq bae ranzdaiq byaeu bae, daxmeh mbangj dieg cix aeu de yawj baenz dwg gij fouz hen ndang gyoengq lwg. Daxmeh itbuen cungj sij mbouj ndaej vut bae, youq seiz mbouj ndaej mbouj nyienh hawj vunz, mizmbangj daxmeh vanzlij genhciz raed diuzsai roengzdaewj, gag yo ce. Gyoengqde naeuz cijmiz yienghneix, cij gangj-naeuz bouxcawj gaeuq gaengq caeuj diuz nda neix mbouj miz saekdi gvenhaeh, gij hoenz lwnyez cij mbouj liz gyae, ndangdaej cij mbouj miz in mbouj miz bingh, bingzan majhung.

(daj Guengjsae Gyaeundei genjaeu)



▲ Nda aemq lwnyez meh simvan.



▲ Miz nda aemq nyez bae youz riuhehe.

► Canghnda aemq lwg vix guh nda.



▲ Nda aemq lwnyez meh sim'onj.



▲ Gijsiug gwnz nda ndeiyawj lai.



▲ Lan ndaej ndwen, vunz ranzdaiq soengq nda.

